

四庫全書

集部

欽定四庫全書

集部
對山集卷六至

詳校官中書臣孫溶

中書臣劉源溥覆勘

總校官檢討臣何思鈞

校對官編修臣沈清藻

謄錄監生臣徐汝雄

欽定四庫全書

對山集卷六

明康海撰

碑

野田先生碑

先生姓韓氏諱福字德夫其先天長人也始祖宗哲有才畧元末嘗為長興侯賓客覘見太祖知天命有所歸既而去之曾祖弘從戒關中世籍西安前衛祖瑛生

父鐸鄉試舉人累官茂州知州茂州娶趙氏生先生後以先生貴贈茂州為知府趙為恭人先生幼而穎慧長而超拔以成化辛丑進士除知滑縣巖已正法滑用大治旋以憂去百姓戀戀若失慈母後除知章丘治悉如滑三年徵為四川道監察御史巡按宣大舉劾明允時望是歸陞大名知府知府八年再入覲朝廷以其治平為天下第一錫宴吏部觀者盈道皆爭覩韓大名曰重生包老云陞淞江布政司叅政方去則轉大理寺右少卿

奉敕總理直隸軍務馬政後陞都察院右僉都御史巡撫保定等處地方弭盜安民今甚其比復命總督蘇松糧儲未幾又命回院管事時劉瑾方執事忤瑾下錦衣詔獄三月始釋後陞戶部左侍郎凡有會議先生惟以是非所在持論天下陰受其福者多矣俄命兼左副都御史整理湖廣糧儲方綜理間值廟堂以遼東屯田清查失實於是又改命先生往遼東時瑾率以指授先生惟不如指故瑾益怒先生遂免官歸此正德四年七月

事也先是先生在湖廣夔緣者賂瑾則以先生封皮北
行後一年瑾伏誅竟以湖廣封皮坐累謫戍固原至今
上即位始赦還西安前衛在田二十四年康彊無恙自
檢益嚴士大夫庶民小子親就先生如有弗逮春秋八
十有一躍馬省耕捷於少年語稱仁者壽先生非邪弘
治乙丑冬予北上會先生於邢臺其議論皆極當世之
務綜理曲折無往不獲予始物色先生治大名事其究
有司嚴保甲教樹藝諸事則政得樞要故每行必準

璽書所謂政平訟理吏畏民懷古之循良莫能及也斯
實錄矣張孟獨撰先生行狀言大名事甚詳蓋有見之
言非徒設也壬辰八月丁丑先生卒十一月己未合葬
於吳恭人之窆禮也先生之孫生員詢長安佳士也予
宿重之光宗嗣美當在若人因詢請為先生之碑故畧
載行事系之以辭庶考德者不厭其繁而步武者能思
其要辭曰維先生世之偉人厥藏允厚行方物憚位大
弗究豈時命之使然抑在我之何咎木塔新阡兆同元

媿履不愧心宜爾遐壽子孫振振具美且秀慶佑自天
益遠益懋考德采休視在華胄

明封承德郎吏部文選清吏司主事馬公墓碑

弘治時海事敬皇帝欵湖馬子應祥以進士歷知河內
歛而聲聞達於京師洎徵入為稽勲主事則與鄴人王
九思及海為友道誦古昔則法先王一時名大夫莫之
能先焉毅皇帝初應祥迎其夫人封主事公於官邸九
思與海日趨事焉聞其論覩其容質而有文簡而適理

淵乎若深矢乎若直浩乎若不可量蓋古之遺德也正
德庚午予罷翰林嘗遨遊三輔之間考往蹟眺名里數
獲拜公於堂乙亥之冬公乃以疾捐賓客矣嗚呼痛哉
世有哲人為民軌則乃不能俾之永享遐算使賢者承
其式不肖者易其故豈非風俗之不幸哉往者應祥以
海為公墓碑海不敏嘗得君子之教於心久矣茲安可
辭於是述公之行事於碑曰公姓馬氏諱倫字宗彛先
世蓋高苑人祖道原孔武有力洪武時從秦王就國後

調西安左衛故子孫世為西安人而居菜市里中道原生六子其第四子昇配戴氏生公少而孤以卓犖自負馬氏故多俠西安人或多畏之公獨耻之曰丈夫當以信義則於鄉人何區區若是者故西安人咸曰宗彝長者不可不修問也公素愛畜產而家或弗豐於是以所有易馬貨之即能裕用不之已而復自笑曰財取足用而已役役於此不亦苦乎後亦棄絕不為公天性慷慨好義急人之難無避水火實非利一錢者河州衛指揮

金冕有急使人挾二百金將有所遺而使館公家金未及遺而使者留金於公以去死於塗三年公自贖予之封識如故又一千戶某亦河州人自京師來至西安有罪亡去以一囊盛百金留公所亦久弗取公又自贖予之其封題猶金氏云故兵部尚書河州王公居家不妄通賓客顧獨喜與公接又遣與其諸子遊公舊字修道王公以為不協於義以宗彛更之自為說以贈公王公嘗謂公曰反金事不難俾數年出金以息所得蓋不細

矣而封識不移此正其所難耳王九思曰王公振古之英社稷之臣也重公如此君子於是因有以覘知公矣故西安諸學士大夫鉅人長者無不愛慕公願與公遊非苟然同俗也公事母戴夫人誠孝曲至夫人以貞節自誓而公能承顏奉歡老壽被旌顯於井疆有榮耀焉西安人嘗論述公之行事謂公性快直無論尊貴人洎能受與不能受輒面道其是非人猶有怒也公隨已忘之又輒與好處之不紀其過以此人愈益敬公故私相

勉勵唯恐有聞如此也公生景泰戊午十二月二十四日壽益七十有八先配安人王氏其先灤州人陽和衛百戶林之孫伯父榮以才畧改西安左衛署鎮撫父貴偕其兄來關中因以安人有女德歸公云善事戴夫人得其歡心而公之嚴毅能無逆志則其貞順之性益有人人之所難矣壽六十有一卒生男子二人長即應祥累官山西按察司副使次應昌嗣於公德女子三人殷富張嵩李蕃者壻也而嵩為河南府同知云孫男子五

人平咸寧縣學生中千辛午孫女子三人長嫁指揮襲
子周邦圻死改適千戶夏浹次適長安學生楊宗輝季
未嫁死曾孫子二人女子一人苗裔盛矣繼娶王氏亦
先卒又繼杜氏公卒之二年丁丑三月七日與王安人
合葬樂遊原新塋又七年海始撰碑刻諸墓左嗚呼公
之遺德顧此何能詳者然有求知公德於千百世之下
者其或可考於茲云爾辭曰惟馬孟父世篤其慶爰值
其祥迺克有生是惟封公惟馬之光桓桓高苑建此有

宅克綏關輔俾壽而昌孫子以強姓右宗亢服此令名
故墓累而崇根培而茂德之不爽音之不戕毋謂奚當
嗣於按察其光益長萬夫之望樂遊之阡永惟公嘉元
堂閔閔神道克廣南山是瞻從以孫子胡不萬年

封儒林郎翰林修撰呂公墓碑

公諱溥字某家世高陵人也其始祖曰世昌又幾世至
彬卿生八八生興興生貴貴生鑑鑑娶魏氏生公及其弟
博公長子柵者海友也海以柵友則數之高陵因得數

拜公親見其容貌聞其言論觀其行事知公之宜有柵也公以正德丙子五月十六日卒於家七月九日葬於縣北祖塋當時柵以海為公墓碑海懼匪德不能昭述盛德揚著幽光故至於今始勉復於柵焉夫人子於所生者生也莫不欲其榮歿也莫不欲其哀言語行誼莫不欲其傳然虛誇鮮實人指議至矣尚美言傳哉故海之自矢也不憂天下之不信吾言而憂吾言之不足以自信夫公鄉里恒人無麗辭輝藻以要譽文學無糞財

崇職以驚炫流俗無竒節詭行以聳世習然海數言不
置非所以私其所好也示天下以長者之道所以廣教
布德懲勸浮靡也海惟公朴實不華耕鑿飲食之外一
無所為海不敢輕誣之曰遯世不仕也孝親友弟守身
畏法處親戚鄰里無所欺負治生期於僅足責人不為
己甚雖傳記所載典冊所訓何弗啻哉此公之大畧人
人易言之人人不能為者故君子素其位而行不願乎
其外君子無入而不自得焉若公者於此道庶幾否耶

公美髯鶴幹望之如神仙達識事體深計者莫能會其
意其指揮是非談述理義學者或鮮焉志稱其決魏某
詐嚇李縣判之事豈非其事實哉墨劉之鬪墨嘗謀酖
其老病以償劉矣片言之間卻酖已鬪生墨氏長少益
幾人也其後又解姪婦之死平劉李之怨訟買田逋稅
者官不能稽取板冊以公一言而決縣官定徃役辟於
里書方伯至亦信以去公言諸富平道中方伯即歸以
正之其已壯哉公居常惡衣糲食休休自娛既受封貴

顯猶著補綴履純布終其身無怨恫於人少日以大戶
輸餉榆林同輸者為掩昧得貲皆笑公歸無完履及同
輸者發覺易子破產公獨安居闌闌至今應輸者必自
戒飭曰慎不可亡若呂公閒居嘗謂枏曰汝知仕之大
本矣乎無他慎取與爾有餽者無故而餽豈無所為也
輒令反之寢疾經兩歲枏晝夜侍不敢少怠或履聲稍
震猶厲色以責曰汝侍天子側亦當爾邪病且革呼枏
語曰汝受朝廷榮寵他日當竭力報國無得自便宜咨

稟汝叔而行公所以愛其弟者死猶未已也曩聞高陵人言公壯時父命為居室將於弟異公乃擇大木為弟室弟讓公公曰安知為爾室也室成乃率以與弟配宋氏潘府教授宋公之孫女也宋公愛其孫不欲與凡子李州判者宋公之友也公十五即為李所器曰此大美弗興若身當興若子孫故宋公因以孫妻公當其時諸宋薄公貧也李君曰渠稍長豈止如爾家後其言卒驗云宋安人既配公奉其家範事舅姑處妯娌各得其道

諸呂內外無弗悅者柵之少也安人壹是以身教之凡
枕輦刺繡故事必曰此賢此孝講說大義疊疊不倦又
恒誦其祖教授公之遺行以詔柵故柵之所以為天下
之士者其父母之教有然也公生正統戊辰五月十四
日春秋六十又九安人與公同生生七月二十一卒弘
治乙卯五月八日壽止四十有八正德癸酉三月一日
以柵封公為儒林郎翰林院修撰贈宋氏為安人繼室
侯氏亦封如安人焉子三人柵舉正德戊辰進士第一

官翰林修撰為上經筵講官仲曰梓公葬後五年歿季
曰栖縣學生志弗忝兄二十一歲死女一人嫁劉孟陽
孫子三人田縣學生甸柎子留梓子孫女三人嗚呼其
傳盛矣銘曰維呂氏世懋德蘊靈尚父啟齊爰有高陵
世昌孔武孫子是刑及彬卿父高陵以興至於六葉封
君乃生纘此懿德厥宗用成篤生我友維邦之楨直義
廣孝公志斯承昔在壬申拜公於庭望之則嚴即之則
平溫恭易簡若蘭之馨匪德曷永匪言孰明享不盡孝

德不媿齡遠近悲悼况云我情高陵之北實惟廣垌建
爾元宅萬世之寧考光擣耀因勒斯銘

明奉直大夫南京吏部清吏司署郎中雙流縣學

教諭胡公墓碑

公諱士濟字澤民秦安人也曾大父鈞自某州徙居秦
安豐財厚德人咸讓之生子海幼有大志未售乃躬耕
於南垌之野休休然若將終身益古沮溺者流云子璉
善文辭累舉不第任為南陂知縣平以近民嚴以懲傲

盜不涉境蝗不害稼民用乂安九載吏部方以為良欲
登用之顧懇疏乞歸有詔嘉其去就特許之道過南陂
士民攀送者相望於道若失慈母雖傳記所稱且何以
加焉生男子七人長士源次士清次士溫次士潔次公
次士洪什邛縣知縣次縣學生士淳公生而穎異幼有
大志獨為南陂公所鍾愛及游縣學與其弟俱以朱氏
詩稱名關隴聞岐山張君精朱氏詩偕往學焉得其傳
以歸大為提學副使浮梁戴公所稱然累舉不利遂盲

於太學方將友天下之士以卒其業值其配李宜人以病卒京師不得已任成都縣學訓導至成都教其諸生立方起惰士用丕興貧者捐廩卹之賴以成立者甚多有高文質者蜀邠人與藩臣某交後某得罪蜀王逮及文質公詣王言文質無罪王即釋文質一時撫按藩臬皆禮重之乃又令署資陽縣教一如成都職滿成都人士攀送者諸縉紳於元都諸官寮於雲臺諸士人於昭覺諸弟子於新都觀者羣相歎息謂所稀覩至今猶美

談焉陞鹽亭縣教諭尋以內艱復除雙流仍以教成都者教其諸生彬彬乎與他縣異兩受臺檄攝其縣事民殊以為便已且人人自勵惟恐弗馴無面見公所謂有恥且格非與正德戊辰子纘宗以進士高等詔刻其策命為翰林院檢討明年己巳公惟雙流職滿致仕歸泰安戊寅以纘宗封公為奉直大夫南京驗封清吏司郎中先配李繼趙皆宜人今上即位詔百官父母既受封贈者其服色同子時纘宗知安慶府故又加公以四品

服焉其生可謂榮矣嘉靖壬辰四月壽八十又四卒於家纘宗以山西布政使奔喪歸已而徒跣來武功請為公碑以樹之墓道海嘗於姻友張用昭氏得聞公之懿德若歸蒲銘之金於子與憫盜騾者之欲悔其過而未逮數事宜其子孫振振翼翼允宗逝德有如吾纘宗君往歲海嘗獲侍公之杖履望其容接其論逾於所聞多矣備極榮養安享高年謂樂只君子福履綏之正公之謂乎李宜人國子監生玘之女有淑德宜於公卒時年

三十又二益成化丁未也公生男子四人長即纘宗次
正宗次可宗次在宗纘宗初以檢討謫嘉定判官陞潼
川州知州乃有南京吏部之命尋知蘇州歷淞江山西
山東布政司叅政乃陞令職文章政事蔚然名世正宗
以下皆學待舉思齊厥兄女子三人長歸通判孫述先
次歸義官董瑩季歸高第孫男子七人初禱被祕袂初
袒皆讀書力學孫女子一人尚幼未聘其允昌矣海與
纘宗友善善義不可辭銘曰惟胡仲父其德克崇食不似

德其後乃豐粵惟伯子靡受弗庸郁郁翼翼為時文
宗光承帝賚尚弼丕功南垞之兆厥墳隆隆配以伉儷
終古是同刻銘表墓用逖休風

先公墓碑

先公諱健字自強上世河南固始人始祖諱政始徙來
居武功長寧生子諱廷瑞為元興化學官關中學士大
夫尊之為西原先生西原先生生子六諱世睦者生子
二諱珙者生子諱汝楫初為縣學訓導辟為燕府官

後出為安岳令太宗皇帝既靖難召為北京行部左侍郎賜璽書留北京輔皇太子凡北京事從所自行後上累以論功當侯則固辭不受卒六年上乃召其子諱爵與禋至曰昔侍郎有三子今何二子來諱爵對曰先臣中子年以賈出外不得奉詔上乃以諱爵為上林監正禋副而賜年千金鏹數十千貫敕所在毋稅關津吏毋得詰察至仁宗皇帝時侍郎始贈為資善大夫工部尚書而後諱爵累官至中議大夫贊治尹南京

太常寺少卿少卿取夫人李氏生先公始先公生時先尚書方在行部一日太宗皇帝召先尚書諭曰聞先生生有孫此可慰老景矣已命左右記待長時錄用報先生今宜與先生賀乃賜宴及馬匹鈔幣若干又賜國師輪子曰善保護善保護先公生五年而先尚書卒及壯也又隨先太常居南京先太常卒也英宗皇帝復大寶召錄先尚書子孫而先公以詔至送吏部見部尚書則由部甬道入又長揖部尚書不拜也尚書大夫怒欲竟

不與官職部尚書不肯曰此太宗皇帝所故命而上以
報尚書者乃請與通政司知事俾以祿奉祠尚書焉先
公為知事歸也又二十年病痿不履痿三年也乃不起
夫人袁氏浙江按察司僉事溥女柔順有則宜於先公
生子五人長曰予先君鏞次曰銓又次曰錫曰鑾曰錦
先公以已抱負濶大不得施設自見而家世膺受國祉
又厚也於是日日躬自督課使五子各自治經舉進士
故予先君卒時懇懇言先公謂予小子海及諸昆弟之

小子當廣志意成聞人以報先公即否亦當必舉進士
夫先公形貌脩偉隆準而背聳豈言沈厚有則宜大貴
於世施設其抱乃淹晦以終其身至於予先君昆弟猶
扁閉不發此其蓄何不厚也而乃如此曷也人嘗言先
公通達世務雖古之名實者何不方也其孝弟忠信質
直亮毅者何弗訓也文章稽古之事辭賦曲藝之細曷
非可傳也然而終其身淹也斯惟予小子海日夜痛心
亦終其身而不能忘也今小子海方圖永久於先君然

宜先公之事故撫述舊聞鑣諸堅石辭曰粵惟康氏
世沐休祥裔本西周衛叔建邦纘戎承允適有烈光惟
多令德固始是張洎宋中葉遷北長寧鼻祖丕奮奕葉
斯昌五世慶積東里乃生輔弼文宗宇內用襄功大不
有五十而亡辭彼茅土世遠逾芳太常是嗣其聲煌煌
兄弟竝躍大啟厥康迤及我祖昭德彌長事業天嗇孫
子惟良似續無忝配於周京履義秉節克光有明若珠
在澤若熹在堂有目咸睹奚動不減永惟祖德思念曷

忘唐山之阡左右若防元寢宥密可奉幽藏刻碑述德
世萬其承

康氏第一子德瞻墓碑

第一諱阜字德瞻先君平陽府君冢子也幼善穎悟強
記能於詞賦詩人之事年十有九歲暴病卒先葬近郊
西原以多雜葬者迺改縣北鳳岡之麓銘曰瘞矣而
遷維以子安胡不萬年

墓表

明進階光祿大夫南京工部尚書李公墓表

公諱善字宗元家世隴州人也高祖公賜高郵縣知縣
配范氏生惟中以子昇貴贈浙江道監察御史而封其
配某氏為太孺人昇累官至浙江按察司副使配荀氏
傅氏俱封孺人生子溥即公父也太學生為某倉大
使以公貴封廣西道監察御史配馮氏封孺人公少磊
落負氣及長就學已浸浸有時名中成化丁酉鄉試明
年戊戌第進士拜行人司行人能不辱使命擢南京廣

西道監察御史清理廬鳳淮陽軍伍滌弊省証人於今
誦之弘治戊申有外艱辛亥改浙江道監察御史巡按
遼東多所舉劾將吏不法者悉奏黜之遼東還陞河南
按察使僉事值張秋河決上遣內外重臣提督塞河知
非公不可於是悉以委公卒至底績上甚嘉之因陞俸
一級以內艱改湖廣僉事值荆襄賊何淮等作亂淮自
為剷平王而其徒至數百人子女財帛所過一空道路
阻絕公召指揮呂高等諭議建策賊衆悉擒事聞上命

陞俸一級已而妖人熊彥和等作亂偽號已定陰相應附者數萬人公命呂高等亟捕彥和等數人坐法而焚其應附人名籍人心用安與侈功倖僭者異矣於乎仁哉已未陞山東按察司副使兵備臨清邏姦按偽時以為難甲子陞山西按察使持平慎法吏民畏之正德丙寅陞四川右布政使尋轉左祛弊政節公財察軌運衡重輕悉稱蜀民賴焉蜀故為番戎所寇而某番尤盛鎮巡請命將征勦而太監羅籥與公計事謂非兵十萬不

可公曰師出十萬日費千金民困歲歎公私俱竭恐邊
事未平而內變復起奈何且番酋已知朝廷用兵勦罪
恐懼無以自計若遣人宣布德意宜必從之果不從然
後舉兵未晚也於是遣王玉等入番宣諭諸酋歎服其
長悉從玉來獻甲以降誓永為良民捷奏上大喜賜大
紅織金衣一襲白金十兩尋陞南京都察院右副都御
史會考察京官公揚清激濁興論允協俄陞南京刑部
右侍郎而用法平慎凡事多稽援故事洎事定衆方服

公長者有見云若盜冊人王真是其一也其事載公家集茲不載庚午陞南京工部尚書正規省費先後所無有勅命公提督修理孝陵并懿文殿宇公量工聚材深有計度厥功垂成會有疾懇乞歸致上竟允之歸十有三年為嘉靖元年奉恩詔進階光祿大夫有司備綵弊羊酒間勞於家人咸榮之又三年乙酉秋八月癸丑卒於正寢距其生正統甲子四月乙酉春秋八十有二夫人周氏華亭教諭遷安周公之女先公卒其懿行自

有志傳側室鮑氏劉氏皆貞淑類周云公有男子四人
守經周夫人出錦衣冠帶總旗七品散官娶唐氏亦先
公卒守純州學生聘閻氏娶劉氏守紱娶梁氏守維聘
馬氏娶韓氏俱國子生三人者皆劉出女子四人長適
典科閻傲周出次適鳳翔張珂又次適舉人閻佳皆鮑
出季適千戶白豸劉出孫男子五人塘州學生娶閻氏
珙聘閻氏瑤瑄俱幼孫女子二人長聘閻鏊次聘王
化民守純卜以是歲閏十二月辛巳葬公北原合周夫

人之兆持叅議閻子明狀乞海有以表公之墓嗚呼公之名德鬼然在人居官居鄉無非可師乃奄忽傾逝前輩典刑後將焉賴然茲但以稍述公之行事世次使後之觀者知為公墓而已顧一笏之石豈足以盡載懿德哉海以鄉里晚生辱教有年今公已矣回視世稱達尊長者諄諄懇懇汲引後進復有幾人如公也於乎傷哉公子守經雖不幸早死而嗣德履孝公卿之子亦鮮儷矣守純勤學廣志克綏先猷其進靡度而守綏守維

皆爾雅自好裕然俱良公之心復奚恫哉今孫子彬彬
繁衍昌大揆之古昔蓋龔疏所無也不亦盛乎不亦盛
乎

明故文林郎大寧縣知縣許君墓表

君諱諫字廷言家世陝州靈寶人也高祖仕信曾祖實
皆世抱潛德祖聚為安定教諭有厚德大學教人不倦
安定人至今感慕立祠祀焉生三男子以季子襄毅公
之貴贈戶部侍郎其長曰通即君父也配何氏生君與其

兄誼君天資剛毅幼從季父襄毅公學領朱氏詩遊縣學卓有時名九試不第弘治庚戌應貢入太學其志愈力然竟不合於有司也於是以國學監規不均及鄉學稅價太重上言於朝或以為將獲罪於人君不恤也甲子拜清河縣知縣克新其政諸廢具舉當道者殊以為能後以戚里莊田坐繫詔獄改知臨晉君曰為民獲罪雖死不恨况改近地乎君至臨晉則慎法禁嚴偷薄民大悅服未幾以外艱歸服除改知大寧大寧俗尚朴畧

少文君又以文雅飭其政治更稱善偶病淋乃棄官歸
徜徉梓里者十餘年敦族厚倫人無間言嘉靖乙酉三
月二十一日卒君生正統己巳十二月十四日春秋凡
七十有七云初娶李氏生女一適國子生鄭鍾繼娶王
氏生女二長適李宸次適王簿張珍三娶王氏無出四
娶呂氏生子三人僑修備側室楊氏生子四人佶佇儼
作女二人長適散官張天祿次適李繼思而僑修佶佇
儼皆縣學生可以嗣君休德矣孫子三人福安薛安某

安孫女七人尚幼未聘於予予昔與君弟令學士廷綸
侍郎廷美同遊翰林每及其家世則恒述君修德砥行
之事謂君因心孝友然試雖不獲第於科目而三令大
邑俱有良名亦可以少畢其志矣予子栗娶君妹婿布
政使楊君叔安之子則君從甥壻也比來靈寶君弟茂
才廷陳率君諸子以狀洎志銘授予請予表君之墓道
志言君撫故兄子价偉僕倬如已出雖老年寢疾言及
二親與季父襄毅未嘗不流涕於枕其居常又以立身

處家之道告戒諸子諸子若僑佶等又皆學文修行將
俱大售於時為世令人君之所以教於家者視所以施
之官秩曾少異哉予南至號畧訪函谷故蹟過梁村望
及君墳突然與君先公之墳相翼蓋百世之安也其子
孫興盛繁衍孰謂無所自乎夫前人以德昌庇其後後
人益求其德衍其昌庇之福引而益長緝而益光則許
氏之世雖百世可也於乎僑與諸弟尚其勗之哉

對山集卷六

欽定四庫全書

對山集卷七

明 康海 撰

墓志

明故承德郎戶部貴州司主事閻君墓志銘

君諱倬字允章號山泉子太子太傅兵部尚書恒齋公
之季子也世為隴州人曾祖秀未仕祖璿宣德乙卯舉
人歷任南充嶽陽昌邑廣昌濟源教諭俱以太傅貴贈

通議大夫都察院右副都御史配王氏贈淑人生二子
長仲實以進士起家累官吏部考功員外有盛德鉅名
所為詩成化弘治間海內爭誦之予為諸生時嘗辱其
與進蓋歐陽文忠之流焉次仲字即太傅公雅量宏度
雖在顯順而厥施罔究武廟臨御之初固已兆有所尼
之漸矣先配夫人仲氏生三子儒佑傳繼配夫人袁氏生
二子俸及君君幼穎異不凡袁夫人夢鳳鳴樓屋上覺
而生君暨就外傳日記千言不忘年十三即能詩與文

伯尤知州君侃於寺中見其詩謂太傅公曰吾家能詩者此人也太傅公喜乃遣從谿田馬先生受胡氏春秋提學秦君文深器許之令補州學生己卯鄉試提學大復何子景明試竣西歸語予曰關中士吾得二人隴州閻倬延安董珊子幸識之後關中稱名士者必二子也是科二子果中高等予由是切慕二君之才君第後則不棄予過則必訪纏繆數日始歸予以其文采肖考功溫雅肖太傅士大夫或以予為知人後君登嘉靖己丑

進士除知聞喜縣豈弟之政永蘖之操吏民感畏至不
忍欺暇則課士勸學科貢不匱君之教也一時撫按旌
賢舉最不可勝數乙未轉戶部主事民扳轅不忍去乃
立碑頌德以東漢陳太丘內黃張問行武功李朝綱與
君題為四君子可以知其政矣在戶部分理通州倉出
納詳慎丙申總理三河大壩草場推督伸縮悉有條理
歲餘所起至十餘萬却廩餼慎獄訟三河人愛戴歌誦
至不容口閒則日課一詩皆清新爾雅得詩人之意大

復之許詎弗信哉值上郊社禮成推恩臣下贈太傅公
光祿大夫柱國太子太傅兵部尚書袁夫人一品太夫
人丁酉督餉固原事竣歸省太夫人遘疾具疏養病允
之明年己亥三月辛未竟不起矣於戲痛哉君世之懿
寶也闕中文獻予方望君將實懸表以振厥哀乃若此
天且胡以生君又且胡以弗壽於君豈天亦無奈於數
而鬼神妬而奪之邪抑如李賀冀修文於天天受而閔
之邪於戲痛哉君生弘治甲寅五月五日壬寅享年纔

四十有六爾配劉氏布政使顯之女也封安人生男子
二人館州學生娶子弟貢士淳女次錡未聘女子四人
長嫁雲南叅議郭田子生員中玉次嫁戶部郎中邵伯
宗子舉人景次聘引禮舍人張珊子某次出育於房氏
妹孫男女各一人俱幼君有遺詩二卷予將序而刻之
君可以不死矣是年冬十一月九日壬寅館等將葬君
於太傅公墓側界其女弟夫景出君姪鉤所具狀請予
銘其墓石予知君者且又重以姻契義不可辭銘曰隆

隆惟閭闕隴所瞻鳳起予紹何用弗悅彼科甲其易
若探王謝是並韋杜豈參繫君之才中壽而鈴大用弗
究視后則兼祔葬考側永叶我占遺德不泯遺詩可耽
徵懿考實世萬斯函

明封承德郎刑部主事張公墓志銘

公諱通字大亨家世長安杜陵人也上世譜失無徵祖
張大公生張二公張二公生公兄弟四人而公長焉公
生而秉德寡言笑不逐羣戲十五能通大學大義張二

公益異之令就學洎家道少衰乃令就賈二公曰有子如此弗能令振且達宜非命邪豈非命邪賈不數年其足跡已徧天下而諸關中言賈者皆出公下矣然公性憚厚利而僅取足曰苟可以給日用則生道所關如是而已夫何以厚為哉此其意慮宜庸人所能識哉成化乙巳關中大飢人相食也公諸弟方在襁褓而二公又解作業公曰家無餘積而丁此大難親且老矣吾何以坐承其變於是轉糴襄漢手足皆疲而家具溫飽二

公謂公曰備穀防旱養子防饑今於汝驗之矣遂泣數
行下公亦數行下洎諸弟長成教令有立娶令有家二
公又泣語公曰此諸兒我生之汝成之諸兒不忘汝吾
將瞑目無悔矣故令關中稱孝友者獨先公焉蓋其誠
意惻怛出於天性如此云公娶高氏生男子二長治道
甲戌進士初為長垣知縣有駿聲遷刑部主事娶田氏
繼娶陳氏次治化娶安氏一女子未聘夫孫男子二人
其苗裔漸以盛矣公生天順戊寅七月戊子卒嘉靖癸

未五月己酉春秋六十有六明年甲申某月日將葬公於曲江新阡治道衰經奉狀來請予為銘予有居在長安書院坊益與刑部居甚邇從長老聞公行實與狀無少異公心雖孝友而天性剛毅正直與人交一本公道無所私曲人有過能面道之構者解失者復得容接者人人自以為喜此殆有古先長者之意焉刑部君曰正德丙子先人以先祖命視予長垣居無何一日方據案食忽棄筋太息曰吾心弗寧如此必吾親有弗安者即

命駕適歸適先祖母病居十一日而先祖母卒四月而
先祖亦卒身在數千里外而喘息呼吸與親無間非心
之篤孝何以感應神速若此於戲難矣哉嘗謂刑部君
曰吾家世業農畝至汝方以進士取官吾宗顯矣汝何
以自為哉又曰世自先曾以上皆無可考汝尚勵之此
其微義大旨與司馬父子相告語者何異今刑部君操
德砥行名實昭迥抗節超邁非公之所教耶當時舉重
其文采予猶以為末故心敬好之弗專言焉於是為之

銘曰維大亨父蓄光不發留待厥子顯名方夏實承迺
求以肇後始若彼巨滙先濼而微故至無紀高官撫仕
世所共尊義或弗齒故君子疾沒世而名弗稱千秋萬
歲高岸為谷况此浮榮若大亨父下有厥子其道豈窮
曲江之阡峩峩屹屹子孫瞻哉可以永終

明故贈文林郎江西道監察御史李公太孺人彭
氏合葬墓志銘

公諱文厚字尚賢武功世族也曾祖永祖聰皆鄉之長者

聰娶某氏生公一人公幼有志於大人之學值家貧不
果長而謹厚與物無忤配彭氏長者端之第三女也生
二男子長曰鳳次曰朝綱朝綱資性穎敏公曰興吾宗
者其朝綱乎命習蔡氏尚書正德丙子中陝西鄉試高
等明年試禮部不第以乙榜拜陽曲教諭或勸之曰父
命也陽曲二年為正德己卯正月公卒於家由生景泰
甲戌享年六十有六公卒六年鳳亦卒朝綱免喪拜章
丘教諭未幾陞聞喜知縣被選為江西道監察御史此

嘉靖庚寅事也值上上兩宮徽號禮成推恩臣下贈公
為文林郎江西道監察御史封彭氏為太孺人又三年
朝綱知青州府乃奉太孺人於青州越二年丁酉十一
月某日太孺人卒於青州由生景泰甲戌享年八十又
四明年正月朝綱奉太孺人之柩還武功明年乙亥四
月十有一日葬太孺人於東原先塋合公之窆以予有
姻契屬予銘其墓石予惟公淳德休風克承先世是以
篤生令子備法從守明郡使士大夫傳芬播美以及無

窮而太孺人事舅姑勤紡績又有以承公之志植善萃
祥享厥榮養生榮死哀諸福備矣尚何憾哉太孺人生
二女子一適孟文達一適楊士化五孫男子九式生員
九疇業農九山九川九敘俱就外傳五孫女子已嫁及
聘者四人未聘者一人牛大福與予甥生員習方楊河
楊長史子文光婿也其名隆慶與直定者為二曾孫男
幼在室者為二曾孫女子女孫馬常則聘其長者苗裔
繁矣銘曰猗與武功族惟李氏往代孔揚入明中已涵

蘊既久必開厥美封君昌休其後光只既光且繁奚福
不几東原之阡伉儷偕止豐碑若林其自今始我銘在
石告厥孫子

明故登仕郎永壽王教授張君墓志銘

君諱儒珍字待聘別號東田居士上世固始人也元固
始人被遷入關中七世祖盛兄弟五六人與俱來而盛
占籍武功興城里盛生汝周文獻文獻生好禮好禮生
敬為君曾祖配馬氏文簡公姊也生海配侯氏生讓配

程氏生三子長翺次士廉季即君君生而孝友慈祥謹
恪幼即嗜學十八充縣學成化甲辰關中饑人相食乃
與其兄奉其父母就食漢中洋縣凡衣食之奉百方匍
匐親志用安不知其為流離也一日自傍邑歸獨行山
中幾百里許杳無人烟而饑憊已甚忽雲霾四合咫尺
不辨君坐石上自分必死矣頃雲開見岩下有王瓜蔓
數瓜累然取噉之饑憊若失此孝感也居洋一年母卒
君哀毀骨立洋之士人稱說其孝若不容口明年兄某

奉其父歸又一年則聞父病劇君不辦衣糧不辭主人
乃宵夜行至家不知足之重脰也居數日而父卒哭泣
之哀遠近嗟歎弘治己酉獨行至洋具小棺負母骨歸
合葬於父每所至設香案雖簞食豆羹必祭而後食則
跪告曰今日將適某處其孝有如此者傳記所稱殆何
加焉君讀書有大志累舉不利正德戊寅以歲貢拜河
間縣學訓導又八年陞南皮縣學教諭所在以忠信教
人雖豪生俠士亦服其教無敢易者彬彬之士懷若父

母傳曰恭儉豈可以聲音笑貌為哉如君者非其人耶
嘉靖癸巳陞永壽王教授王以為長者殊禮敬之明年
九月二十七日庚寅卒於官王重悲悼以為失吾良傳
君生天順壬午五月三日丁酉享年七十有三娶予叔
姊生六男子鑄鑰鉉鎬鑄鍊皆縣學生而鉉鎬先君卒
鑄鍊戊子同科舉人孫男子七人孫女子七人其允繁
矣今年乙未三月二十二日壬午鑄等將葬君於鳳岡
之麓新兆請予銘君之墓於戲君與予同筆硯者十有

餘年言必及義戲不抵諛至於俱老且死未嘗有芥蒂
弗合者亡友鳳麓符生嘗曰友道廢壞已久若東田子
獨何人邪君孝友之心出於天授違親已久思念不忘
諸甥言君在官見佳果美食未嘗不以享不逮親為言
予獨諒焉關中之饑餓殍盈野君曰吾族寧無殍乎乃
以俸金寄極貧者會極貧者絕粒已數日矣得寄即能
延及麥成故其族獨無殍者君之孝友所及也君有才
賢之子對客畧無一言南皮張東之憲使清修之士也

每以君不譽子為士大夫之竒操予深韙之銘曰東田
隆隆何福不豐帝監厥孝錫此令終維德覃厚履則斯
宏既畀賢子開廣厥宗益以多孫我張用崇振振翼翼
允遯休風鳳岡之麓厥土維融我言卜之作子幽宮後
人克承茲封靡窮猗千萬年光我秦雍

承德郎刑部主事東希孟墓志銘

君諱野字希孟上世鞏昌人也高祖良元季守商州兵
亂居華州子孫世為華州人良生驥驥生昇昇生思中

有性行舉進士累官中議大夫贊治尹四川按察司副使夫人薛氏生男子五人周魯漢郊野皆命治蔡沈書傳辟進士魯漢先舉於鄉君尚少也乃卒出遂連舉進士明年弘治癸亥除知陳留縣陳留道衝役繁民貧弊不能堪也君至一一更整約束恭己儉費使為民先又信賞集事疏導教化使清訟獄亡厯喧私鬪也其故為盜掠者以無措斂能安生也往往變更為良人凡所以伸縮者道路傳之皆長者然性善惡惡人及豪逆不法

故往往見犯者皆務盡法亡所舒緩焉河南撫按及布
按重臣皆器重之凡所編籍及訟獄之事其最難者故
亡不以委君君至果一一有度理一時尹縣者莫能或
之先也正德丁卯吏部舉縣職以君年少佚資也但以
刑部主事在刑部人皆曰不媿其先人蓋其先人按察
公故為刑部郎中有平聞於今不窮也冬十月提獄禁
至十一月朔歸歸即中寒又十四日乃不起今年纔二
十又六於乎惜也已矣昔希孟言自兵燹來百十年北

方弟子皆無書籍故陳留置書籍數十百種其有閒暇
率弟子至躬自課亡日政靡不能矣使假之以年而益
自宏肆向裏雖古人曷媿也於乎乃不然也卒之三日
給事段君世高書狀來請為銘後二十日兄魯漢以試
至則又請矣夫希孟性行純美其數脩短如此然視刻
削近名者宜何以終焉嗚呼痛哉已矣希孟娶王氏已
封為孺人子一命曰頤壽甫一歲卒後二日又生女頤
壽神彩瑩澈宜有子矣銘曰年非脩也而已終也嘗非

卑也而已通也德非疚也而已窮也嗟嗟何也嗣有其子亡可憐也

明故霑化縣儒學教諭趙公墓志銘

公諱玉字汝石其始祖曰公用子孫第稱曰南京公云蓋自元之盛日趙氏在南屬近者徙西北時公用尚幼而孤至其寡姑與俱徙平涼遂占籍為平涼人然不知為趙氏何屬也杭在宋為南京其曰南京公可占其苗裔矣公用娶張氏生佳兒佳兒洪武三年置府城東門

坡下宅與弟共居佳兒生得名得名生榮榮生子祥福
正祥子常安弱冠當婚逃去為道士居秦徽山中獵者
每見兩虎倚其廬升木訊焉曰山居與野獸相狎無他
也福以國子生為平谷縣丞取楊氏生公幼即莊敬嗜
學外舅考功員外郎靈臺史公書竒之於是以其長女
議婚云成化甲辰關中譏甚公時從外舅遊學京師亟
以粧奩歸平谷云易粟救荒外舅語諸縉紳咸嘉歎焉
公以偉才積學凡六試場屋輒不第正德丁卯平谷公

卒公既終喪恨不能成父之志應貢上京師途得金襴
甚巨息樹下以待其主至與之主以什一謝公公馳去
不顧廷試後拜元城訓導值惡教諭伐號房戶牖及文
廟樹以貨督求諸生公唯日坐齋課諸生經書惡教諭
愈益嫉公公不為意也遷霑化教諭凡諸生所餽贈皆
辭不受嘉靖己丑致仕歸環堵敝廬蔬食飲水其意脩
然樂也丁酉二月二十四日癸酉公不起矣生天順癸
未九月二十三日己卯春秋七十有五公初娶史氏生

子時元有孫三人守約守敬守業及孫女一早歿繼娶
范氏未舉子而卒繼又娶許氏生子時春及女子一人
為生員張雲龍妻側室王氏生子時泰及一女子尚幼
初時春以己巳歲生公語諸親友曰此兒有異須吾得
學官祿力教之以成吾父之志故有元城之行後至霑
化時春愈益開悟公日以談笑飲酒為樂壬午時春年
十四漁石唐公虞佐石岡蔡公承之為予道其才美若
不容口然但舉鄉試第三人予私憤焉丙戌會試乃舉

第一改庶吉士讀中秘書出館授刑部主事庚寅上封
事罷主事歸光大之業方正之氣海內推焉公可謂有
子矣夫比公疾革遺命時春朝終夕殮勿停柩勿告訃
勿厚葬必以予志其墓石茲將以月日葬公南山文原
時春以狀來請銘從公志也公之盛德雅操備在家集
不可枚舉有子如刑部終無弗傳者矣銘曰世有哲人
必昌厥後其昌伊何匪祿匪富令聞不忘厥履允厚厥
履允厚萬祀所崇若彼茂草奚其為容於惟先生逝哉

鉅宗遡流循源有倬其洪公需我銘愧無闡衷佳城魏
魏令子所封孝子不替斯公令終

明故封文林郎雲南道監察御史儒學訓導楊公

墓志銘

公諱舟字濟川別號訥菴家世武功人也曾祖禮國初
舉人才引疾不就祖安父鑑俱孝弟力田為鄉善人鑑
生四子長善次鼎次哲季公公下當為縣學生讀書不
有哲字成父命公繼哲為學生治朱氏易籍然有名於時成化

丁酉鄉試已中式錄其文矣有某叅議欲私其門客乃
抵落公卷此後累試皆弗售士論惜焉弘治庚戌應貢
上禮部拜夏縣儒學訓導勤以教人禮以自御夏人至
今猶誦說不忘云九載滿年尚未及六旬且將陟官也
乃幡然告歸家無厚蓄守薄田數十畝其心休休若將
終身焉此可以占識公志矣正德辛未長子秉中第進
士為行人又三年為御史勅封公為文林郎雲南道監
察御史配張氏封為太孺人太孺人鄉善人貴女也年

二十歸於公善執婦道勤儉備至故能相成公學公已
有官乃彌喜紡織所衣裙布敝猶不易曰我性蓋如是
正德辛巳十一月八日公以疾卒於家繇生正統庚申
三月二日春秋蓋八十有二葬後四年嘉靖丙戌六月
二日孺人亦卒繇生正統壬戌六月二十八日春秋蓋
八十有五今年戊子九月三日秉中將奉孺人之柩啟
壙附葬於公以狀授海請以銘公之墓海自兒童時嘗
從鄉先生之後私識公之行事公天性孝友加以稟賦

謹厚終其身鄉黨宗族咸無閒言兩兄繼歿撫其遺孤無異所出堂叔某死無後葬之以禮又為主時祀於家秉中既貴祿之所入計已饒裕公歆然如布衣時顧自處益儉每飲食至輒以先公先夫人逝不及養感泣不已此亦可以謂有終身之慕矣張孺人性尤儉素遺訓甚多秉中嘗述以告予曰不肖為御史曾拜吾母於堂記吾母之言曰我在家時聞人說而祖善而父將來必做官及我歸而父見而祖接人若恐傷乃而父果做官

爾官視而父又加顯矣此而父之善所致也而謹識之
凡百勿顧目前當從後看可也不肖攜家口北上吾母
告吾妻曰我平日過活甚難今老矣一薪一米未忍輕
費世常說節儉勝求人諸婦宜深念此日用間汝輩不
愛惜累及吾兒請勿復來見我也此皆表表然可以訓
及將來比跡古之賢母者噫嘻盛哉公與孺人生男子
二人秉中允中秉中以御史陞山西按察司副使允中
受義民爵女子一人適里人党厚孫男子八人詔早夭

餘三尚幼秉中出也純紀俱縣學生而紀夭餘二幼允
中出也孫女子三人秉中所出二一適重慶檢校王堂
一許聘景塾允中所出一適馬河龍俱先歿純出曾孫
女子一人已許聘馬氏苗裔盛矣方公卒時秉中以巡
按四川過家孺人卒時秉中已陞官山西歸省問疾侍
藥屬壙視窆曾無一之不逮所謂不期然而然者非公
與孺人陰德宿厚詎有此哉銘曰武功之南厥川惟臚
土厚水深公墳俱俱孺人是同奠茲終古名德在時懿

訓如睹子孫振振克遵伊武伊武孔賢帝命是延豐章
蔚誦胥賁公阡南山峩峩漆水煎煎永言孝思尚慎諦
旃

故文林郎知吳橋縣王君墓志銘

弘治初關中益有才子焉言出而文成筆挺而思運諸
關中英俊之士莫不以為難能望望焉不敢與之抗見
其文覩其誦述目動口嚅心服志赧者十恒八九吁亦
竒矣予自弱冠與之為友顧其天資之美雖傳記所稱

何以過也乃今卒不能以行見於世忽焉卒矣悲夫天之生才也付之以美大純粹之資而又嗇其所就使之與物同腐顧非斯人之不幸哉此吾友野堂王君仁瑞之卒茲予有以傷士之不辰而感時日之易邁也於戲仁瑞之資豈世之所恒有邪昔馬遷讀服鳥賦深與其同死生輕去就爽然自失仁瑞以名進士試圻縣其欲為之志橫博之氣至欲與宇漢爭高及其退居林麓澹焉脫焉若亡若寄茲亦非綽有餘覲者乎按狀仁瑞姓

王氏諱麒上世寶雞人也自祖某以來率居鳳翔仁瑞
生七歲父琰令就學即若成人年十三四殊為知府張
公本濟所愛曰使其讀書不輟不數年天下無書矣後
果中弘治乙卯鄉試己未進士辛酉除知吳橋能以法
令飭治民敬畏之不三年為州守註罷歸鳳翔年尚銳
也即脫棄其事日徜徉里閭奕棋賦詩若將終身客至
不拘有無必置酒款洽雅歌投壺晏如也嘉靖癸未母
夫人焦氏卒哀毀成疾延及今年戊子二月二十二日

甲子遂不起繇生天順癸未五月九日丁酉春秋六十
有六先娶劉氏郡名家女善執婦道先君十五年卒懿
德在君之自志生男子一人曰元定女子一人嫁國子
監生扶風趙惟珍繼娶李氏鳳翔守禦千戶所鎮撫憲
之姊也德似於劉先君七日亦卒生成化乙未十一月
二十三日戊辰得年五十有四元定將以九月十六日
乙酉合葬君與李孺人於城南劉孺人之壙以予知君
為深當銘君之墓石因以所記於君者道之若夫吳橋

人士感德懷惠繪圖立傳諸事則吳橋志與士大夫所
誦說者人人知之予不欲贅君卒時有孫男子四人孫
女子一人苗裔盛矣銘曰氣凌九有而位不逮心雄萬
古而業未竟豈人履之靡諧抑天數之有定雍城之南
地佳且正子孫振振纘君之慶享不酬德爾後則競銘
以告哀予言匪佞

亡妻安人尚氏墓志銘

安人者故順天推官尚公第二女也母曰賈夫人成化

乙未九月二十八日甲戌生安人重厚嚴恪不必其長
知非凡女子矣昔先君子為予擇婚者數年無一當者
乃後得安人弘治壬子先君子卒又三年乙卯安人歸
予伉儷二十六年而安人卒焉雖其數有不可得而易
者然奚至於予而數遽如此也於戲痛哉安人歸予時
年已二十一歲貞靜恭儉有君子之德其裁制事為動
與義合氣岸凜然烈丈夫或弗如也妯娌姻婭見安人
莫不畏且敬者蓋其意度自能奪人如此也先夫人嘗

曰新婦事我克盡孝道且令二十年毋一解也正德戊辰先夫人寢疾安人晝夜不寐者十有七日洎卒號泣幾隕凡人之婦孰不能此者而因心惻怛則安人一人爾於戲痛哉方子舉進士第一人莫不喜也安人曰道以無垢為貞名以陵實是懼保貞克懼此君子所以進德修業欲及時者也尚何言喜邪此其意可與淺見薄識者道邪予歸葬先夫人之三年庚午劉瑾伏誅言官論予為編氓報至安人撫掌曰不垢得垢是謂罔謬而

今而後夫子蓋卒無垢矣非大慶邪省耕視饁黽勉作
業由庚午至庚辰十有一年口食瑣瑣無弗給者所以
使予放情丘壑鮮復顧慮秋毫皆安人之力也於戲痛
哉安人自初及今事無鉅細未有不白請予而徑行者
其恭和弗專亦可見矣卒之日家人婦子號慟罔極若
喪所生所立家則歿已三年而率行如在其宜夫克家
蓋予之韋弦也何不幸不能與之窮年同斃豈造物者
不使人兼媿並嘉如此也於戲痛哉安人所生男女十

人其六人皆早夭今止有男子一曰臬女子三長嫁舉人張之槩次嫁李世貞季嫁馬襲吉皆生員也嘉靖二年四月二日癸酉將葬安人於許西先塋兒子臬曰大人盍銘諸石以志母安人之壙夫安人之美衆矣人不能詳言者具已載諸家乘不欲繁為辭說銘曰許西之崗籠從崎嶇唐山是名爰自我祖返貞歸始肇啟茲宇左漆右雍前渭後岐地臧孔宜非德孰居汝年弗豐汝道則隆篤順克孝秉素蘊貞我宗用崇千歲一瞬若

旦暨夕詎弗汝齊汝復何疑我行弗磷汝名乃偕汝茲
休哉

文林郎湯陰縣知縣侯君墓志銘

君諱相字良弼上世故武功人也曾祖某生某生恕
有德不仕舉為鄉飲賓娶李氏生男子三人君蓋中子
也少穎異落脫不拘小行年二十予先君平陽公見之
謂君叔蒙城丞清曰此兒神清氣美何不令之學後侯
氏有能亢宗述德者此兒也故遂從為縣學諸生弘治

己酉果舉鄉試高等明年試禮部不第以乙榜為蒲州
學正學正九年再試禮部不第尋有外艱除服上吏部
拜湯陰知縣湯陰邑衝要民貧寔苦徵役號煩難理君
慨然任之曰不能宰是邑書可廢也居一年吏就典列
民信軌訓湯陰稱治平矣然性喜肆遂不通時宜遇尊
官上吏則執禮為敬不若世俗奔走卑屈徃徃為所損
詬雖小事必欲合其約束即尊官上吏不能移未幾有
內艱歸明年遂以朝覲考察閑住人以君英爽有氣年

又壯健未老也君歎之曰嗟乎世人重為官予重使氣
吾欲不失已而官職乃使之是重官不重已非吾志也
縣南有橫渠綠野書院因兒時嘗牧其野遂自號綠野
牧子樂然於家凡十又一年以病腫卒時則正德七年
壬申閏五月十又六日己巳也由生景泰丙子三月二
十日己丑春秋蓋五十又七云君易簣時托符尚玉來
請予與語予至則君已漸矣君弟右指予謂君曰為誰
君曰對山先生也或謂君將有所托君搖首不應予恐

其終而亂也因語之以順生安死之說君勉強為數言
曰即何不知死為吾歸子之賢不肖在天豈敢累故人
所覲故人者銘我墓石使後世知有我云云爾又釋倚
者手向予揖而止予領君意歸且未出戶而君絕矣蓋
予昔未第時君獨重予文謂可名世及病又數數以銘
石見托乃至其大故猶不能忘此其心志所隱蓋何如
哉君體頎面豐多髯善戲謔而喜飲無擇於鄉人故鄉
人無大小皆樂與君遊君為學生時有文名及為學正

湖廣河南皆聘為考試官稱得士云性服善喜得人有
片長即稱之不置居官克自砥礪欲為循良不知上吏
之不可其意卒至貧厄不裕然能慷慨靡撓蔬食豆羹
晏如也配張氏側室王氏生男子一人宗史今為縣學
生娶長安楊教諭從禮女女子二人長嫁楊玠次嫁鄧
際隆孫男子一人圭尚幼在襁褓明年癸酉十一月甲
申葬新寨先塋之次禮也銘曰貞而咎惟眡爾後惟爾
不回爾光則恢我石孔文惟永翼爾墳

劉母恭人高氏墓志銘

恭人中部人萊陽知縣高秉第二女也中部稱望族者恒曰劉高然萊陽君與劉氏生員君準同遊中部學氣誼甚厚遂相與約為婚姻故以恭人妻生員君子封彰德知府焉當其配時生員君已逝久母折夫人再適鄜州王氏封君以四歲遺孤折夫人保育至成立始克還中部及還則家事已狼狽遂求為縣吏云時鄜州王叟亦故折夫人復來依封君恭人左右奉養曲盡孝道折

夫人喜曰婦如此我無以報婦願婦多賢子孫勿若吾
兒孤也天順甲申封君吏滿上京師恭人從之紡績易
米以為食者凡十年後封君為保安州洗馬林倉大使
為毫縣義門巡檢凡百家事由恭人頗致饒裕矣恭人
性嚴正有法所生男子皆教導以禮故皆成名人聞於
世云左僉都御史聰者恭人中子也曩嘗告予曰聰實
不肖凡聰有今日皆老母力曩聰從家君居京師就學
衢舍中方甚貧約母手自勤苦得少貲即以助學費一

日母從下馬牌過見珠冠霞帔者問家君曰此命婦非
貴人妻則貴人母母因指聰曰若能為我辦耶以此聰
益奮志向學後為鄉縣學生自謂科第可立致及試甲
午不第少驕怠矣則或有所聞肆母聞輒杖之聰性喜
奕棋嘗與冠生奕母至杖背罵曰秀才事是如此幹冠
生感悟與聰俱力學後冠生學亦底成曰此固劉母之
賜也母善料能審家事大小無有不中者甲辰乙巳歲
大凶人相食父子不相顧母與家君言今日不但子姪

雖奴僕工作皆要保全一僕有私財者欲出自居母曰
爾所蓄不能當此年輕去恐不免餓死不聽卒餓死聰
舉丁未進士弘治己酉除太平推官時家君已在毫未
幾家君官滿過太平母再留二年朝夕惟以明刑母罔
為戒後有命封家君太平推官母孺人矣又後以聰知
彰德又封家君彰德知府母恭人安享祿養者二十餘
年益豐備矣乃益儉約戒諭如貧賤時云一時縉紳大
夫聞者莫不歎息敬服傳母之能教也予往過彰德與王

敬夫蓋親見之敬夫曰有此母安得無此子孫敬夫者前翰林檢討九思也知人能論故予記其語如此云此可以徵恭人德容之盛矣今年甲戌三月丙子無病卒於家生宣德丁未二月丙寅壽蓋八十八云男子三人玫早卒聰官如前璋順天舉人女子一人鄜州王舉妻孫男子十二人伸縣學生儀偉國學生玫出佐辛未進士戶部主事儼國學生侃舉人官縣學生仁舉人聰出仕縣學生价倬儒璋出孫女子八人嫁者三人宋溥張元傑馬鏞其壻也皆士人妻聘者三人

宋氏與洛川王氏鄜州學生王文禴氏其二尚幼未聘
曾孫男子九人曾孫女子七人其子孫統四十人云於
乎此豈世嘗有也某年某月某日葬新河口黎園村劬
子坪新塋都憲公以狀來請予銘某墓石銘曰坪之廣
兮可以藏德坪之潤兮可以延澤乾向巽兮剛柔節子
孫世萬兮維坪斯宅靈爾康兮永無極

庚午解元吉原靜墓志銘

原靜諱體仁姓吉氏馬嵬世家也高祖某曾祖某祖贊

父友文皆世有懿德富而好禮馬嵬人重之友文娶張氏生原靜幼敏悟不凡讀書輒旁求指趣作為文辭豐贍有氣識者恒以魁解許之從谿田先生治春秋隨試庚午果中鄉試第一主司以為稱任累試禮部不第益更自勵以求必舉及乙未又不第原靜曰吾倦矣予黃山之下有泉可濯有田可耕安能役役自苦盍歸乎來課子蒔藥以終天年比歸寢疾十餘日而卒臨卒索紙筆書七言律一首投筆而絕英邁之氣超捷之才不以

將死少餒非養之有素能若是邪於戲可惜也已由生
成化甲辰十月三日丁巳至嘉靖乙未四月二十四日
甲寅享年蓋五十有二於戲原靜事親孝教子嚴內外
有則舉措率禮予殊嘉其為人方謂可以大受乃至如
此斯非數邪配劉氏興平名家女生男子五人長來逢
守家人業次來獻來朝皆廩膳生次來旬方進未艾女
子四人長許聘予姪餘幼其一則側室某氏所出孫男
子二人曰順曰換梁孫女子三人俱幼是年七月二日

辛酉將葬原靜於北原新兆來朝求以予銘其墓石銘
曰英邁之氣琦瑰之才位既不逮命復懼災於天謂何
胡寧弗哀美名雋操終古是瓌從以令子胡德之衰北
原隆隆永奠元臺刻石啟後用覲厥來

對山集卷七

欽定四庫全書

對山集卷八

明 康海 撰

墓誌

將仕郎河南南陽府學教授封翰林院檢討徵仕

郎王先生墓誌銘

夫賢人長者流風餘韻可以敦薄俗起頑懦當道衰文
弊之日其抹正開誘至不小也然往往莫之能及故禮

義廢絀維常不張君子有憂焉海於是述王先生之行而納諸其墓王先生者鄆人也諱儒字友宗其先河南人仕高陵遂家不去子孫乃為高陵人今有諱元亨者墓在高陵或即始來者與其子孫皆不可考人第稱王大使家墓云元亨以後有三人繼祖繼容繼先然莫能詳所出元季兵起繼容繼先由秦嶺東行出關避兵而繼祖攜妻子渡渭入鄆匿居終南山中至明興始徙鄆城北街故子孫遂世世居鄆焉繼祖生克誠克誠生敬

仁敬仁生琰讀書起家仕為大寧長清知縣以廉直顯
名卒於官生子鉉寬厚博大鄆人稱長者受高年爵年
八十一卒配李氏生三子其長為先生先生隆準竒頷
炯目廣輔而背厚若負進退居止非禮不行年十五遊
學山東於布衣蘇先生受蔡氏尚書三年盡得其學歸
為鄆學諸生成化辛卯舉陝西鄉試試禮部不第慨然
憤曰吾長清公之元孫也昔長清公英英烈烈莫能舉
進士蓋嘗命予曰是在爾小子矣今不舉異日何以報

地下再試戊戌不第以乙榜遂為保寧巴縣學教諭於
是仰天歎曰嗟乎志士若是矣其命也夫其命也夫至
巴品第材質以為教其子弟皆興行踴躍巴素尠科目
至是連舉三人焉弘治己酉復任祥符學教諭其教一
視巴無損益居七年遷南陽府學教授教授三年以外
艱歸遂不復仕云先生始仕巴時欲奉父母入蜀就養
李夫人以道險弗往止奉高年公往居一年高年公還
歲時伏臘及父母旦日未嘗不東嚮泣拜甲辰闕內大

早人相食先生以俸金予仲弟歸養父母召其宗族可
來食者三十人於巴又推其餘令鄰里已之巴者貿易
為食已雖益困則益休然樂也在祥符日謂去鄠逾近
可奉親來養乃數上書高年公弗許欲罷歸去高年公
又不許故思慮浸淫至髮盡白及聞高年公喪痛恨擊
面若不欲更生也故既葬高年公事李夫人終身不易
焉此其誠孝懇至者蓋何如也海曩遊京師見先生之
門人皆深服先生之教嚴毅切至有古人循循之益各

言其與先生送別時眷戀之事猶泣下沾臆其浹洽於人心者若此也此豈區區聲音笑貌可至邪弘治甲子予拜先生於鄴時先生已受封為檢討當母李夫人之喪悴悴蹙蹙不得聞其言論前年壬申予再如鄴拜先生望之休休乎其容洋洋乎其度也接其言淵乎其深粹乎其理也曰此有道者古伏生戴公董生之流也乃吾身親見之乎宜其子孫彬彬然執禮而好義勤問而尚賢此其初有然矣踰年而先生卒蓋癸酉冬十月某

日也先生雖巖以自治而天性溫厚未嘗無所容中情澹然毋以富貴利祿少動諸子科第相接聲望相踵天下識與不識莫不欣異仰慕而先生如有所弗聞者居鄉日與故舊置酒高會洋洋而樂蓋有廣受之風焉配夫人劉氏封孺人生四男子長九思以庶吉士任翰林檢討文名才行聞於時為上經筵講官纂修孝宗實錄成劉瑾用事同翰林諸公以未習時務出轉吏部主事遷員外郎郎中瑾下獄言者以有罪劾謫壽知同知會

天變言者又劾詔以同知致仕歸次九敘甲子舉人九
臯義官九峯戊辰進士河南道監察御史孫男子五人
瀛癸酉舉人潭沐渭漢孫女子八人已嫁者二人鄠學
生楊顯蓋屋學生徐永圖婿也餘與曾孫女一人俱幼
未聘九年月日葬鄠北六老菴之原先塋九思語予曰
曩九思罷壽州會盜起不得行先君賜書開導以理懼
九思有所情也及歸值舍弟九峯以病得告先君見九
思來甚喜慰九思日日率諸弟以奉先君之歡雖即已

病先君中無一留也及再踰年先君卒矣其慟蓋何可言夫宅德厚行閭巷固宜有之亦奚必尊官盛位然莫能一二數者蓋利欲所灼鮮有弗化者斯賢人君子世固所愛慕焉先君之行蓋可以睹矣其賜九思書曰蓋聞萋斐之讒詩人歎息流言之興聖人懼焉此天下古今萬世共聞睹也故曰衆口鑠金積毀消骨此非過語也其有見而言之也夫古之君子竭忠其主非有所不盡也修身慎行其越人非不多也然卒以罹於讒是故

屈原放而離騷興其辭悲婉憤厲讀之泯泯焉使人心
悲泣下而小子何為哉古曰弭謗莫如自修此吾所嘗
奉教於君子天地日月巍乎煥然仰而觀之俯而察之
求無媿於斯斯已矣而又何惑焉夫賢者以一世之絀
成百世之名其道固有然矣小子將何為哉其言理直
而指明議精而引長若此故予得以著於篇詔後世焉
銘曰云云

有明詩人邵晉夫墓誌銘

世有懿實天既畀之於人又靳而藏之豈天無意於斯
世邪抑局於其數雖天亦莫之何也予於邵晉夫之卒
未嘗不歎天道之難忱焉夫福善而禍淫天之道也晉
夫瑰竒靈異之才少年登高第矣乃今覬覦者資之為
竒貨卒陷於晦塞不得施才於國家乃又使之不幸而
死所謂靳而藏之非邪予將誌晉夫墓石而歎天道之
難忱如此於乎天誠何心哉啟我懿實俾之不究其事
不永其年又孰為而來又孰為而歸於乎天誠何心哉

晉夫諱昇上世蓋涇陽人也四世祖克禮始徙居鳳翔
普潤里子孫世為鳳翔人正德末又更為朝陽里克禮
生庭庭生賢賢生泰任為雲南馬龍驛丞配傅氏生晉
夫父戶部員外郎伯宗配宜人沈氏生晉夫洎弟恒夫
泉并三妹焉弘治癸亥冬予得告奉先太安人歸武功
道經靈寶戶部公時滿靈寶教諭予往訪戶部公則出
晉夫之作示予時晉夫方十三歲也雖英氣逼人而進
退爾雅畧無嬉容予甚器之後四年丁卯果中陝西鄉

試第一明年會試禮部既下第會太監劉瑾為其姪求
婚曰吾女必得名士大夫爭以福建戴大賓洎晉夫薦
瑾曰吾關中人所婚惟邵生乃可卒以晉夫壻焉晉夫
躑躅呼天百計求免弗得乃克自樹立畧不與一人通
終日閉戶拊膺讀書而已後瑾伏誅天子以晉夫無所
預事赦為編民關中縉紳大夫莫不重以為寃而晉夫
洋洋粹粹曾無少動於中險夷不改寵辱不形厥覲淵
矣卒未戶部公卒晉夫哭泣之哀雖及終制一如始喪

事沈宜人無所不盡其極日日俟候顏色稍有不悅則憂形於色霽而後已孔子曰色難若晉夫非其人邪往歲予道過鳳翔晉夫數與予言皆殊有造詣予方以為斯文之幸乃後十餘年沈宜人卒而晉夫哀傷成疾治葬舉事小大靡不自為憂勞為膏壯夫且難况晉夫乎嘉靖甲午七月十七日壬午不起矣由生弘治辛亥十一月四日丙子享年四十八四爾於乎傷哉予每以晉夫清癯簡靜後當長年乃若此聞訃之日行道悲痛况

所重乎晉夫讀書過目不忘而精義畢會漢坡先生謂予曰邇會晉夫超詣若彼近之學者誠鮮其人蓋學不自得則矜肆作而實德荒與晉夫不相侔也若劉元勳畢汝勤秦藩張璠曹士奇與晁皆西土之名士也莫不咸感晉夫造就之力詩曰宜弟君子遐不作人言有宜弟之德乃能作人也所配談氏無子沈宜人為置二妾亦無子乃以党氏妹之子延正為後又養表兄沈氏之女適朱本素於乎傷哉晉夫平日所著有文章若干篇

詩若干首小大樂府若干闕詩大旨春秋會義大學衍義隨錄及補遺十七史抄節詩評日紀若干卷晉夫亦可以不死矣明年乙未正月二十一日壬午將葬栢林凹先塋從戶部公之兆予悲晉夫之生晦塞於昌時而流光於來世其弟能稱述潛德如有不及則天道亦難謂其終於無知也為之銘曰維彼雍州名山大川毓靈發祥古多哲人奕世是光奄及有明晉夫以生其履不忒赫赫厥名收於庶佞其直如繩考德究業萬夫之特

靈耀弗常至道每嗇喪此懿寶維世之索轆轆其輪灼
灼其文近覲若蹇後聞則芬栢林之凹云從先人陵谷
可易茲封不磷後賢諦止為有明詩人邵晉夫之墳

奉議大夫工部虞衡清吏司郎中致仕劉君墓誌

銘

君諱汝靖字安之其先澄城人也有為萬戶侯者不知
幾世祖遷來居渭南故世為渭南人高祖敬祖生儀國
初舉賢良為閭中簿生子鎬鎬生隆字文盛景泰庚午

舉人官至濟寧知州配宜人任氏生君與兄汝寧而君
少有異質見者莫不以為奇君益危襟正色無所動成
化乙酉濟寧公命從士人王寵受小學即知灑掃應對
之節濟寧公以為可教也遂盡從寵所學比濟寧公罷
歸渭南臨川伍先生至奇之以為渭南縣諸生明年考
渭南諸生則考君置第一補廩膳由是君騰聲闕輔間
一時藩臬鉅公過皆求試之故聲益揚闕輔士皆固以
為不如君也曩予見吏部尚書許公言為御史時嘗以

喜雨及明皇幾致刑措二論試君甚嘉此蓋其實事云
然兩試甲午丁酉皆不利後浮梁戴先生來提學重以
君文為竒謂君必首舉鄉試明年庚子果中高第會試
又屢不利乃思卒業太學益為瓊臺丘先生京口費先
生所稱許而又屢不利故至弘治癸丑始舉進士猶有
例得依親君歸甫三月以為母任夫人既不幸卒當永
事濟寧公而濟寧公忽遘疾不起君哀毀踰禮聞者莫
不傷之丙辰冬十月拜工部營繕司主事督修通州倉

廠兼收放張家灣磚廠料而二廠皆有中貴人兼轄十六衛官又習近京畿驕縱有素君居三年無敢梗者此固處有其道云爾予舊見邃菴先生通州改建磚廠記言君以舊廠去河五六里舟不能達磚至又顧車轉般每萬計費八十兩天下財力取之不遺錙銖而蒞事者則每制於法比牽於毀譽安常習怠以為通患其有能深慮却顧為斯人圖便安者蓋寡矣磚自始陶至輸所費已不貲又至轉般之苦萬磚所用猶可當中之產

萬萬計之當若何以歲繼歲積而計之當若何予固以
為名言夫士以牽於毀譽不為其當為者何可勝道君
之所為與邃菴之所道安得使天下人人見之庶幾乎
可以興懦而式靡使民恒得錙銖之寬豈不快邪此後
君轉都水主事奉命視荊州抽分滌弊正理毋所易借
事竣價倍往昔戶部尚書以為廉直爾尋陞營繕員外
郎命修秦簡王園能以禮裁抑使其國弗軼往度其昌
言正誼詳見家傳中今聞之尚凜凜云還提督神木五

廠尋又陞虞衡郎中提督隘甲廠未幾繼母史夫人卒
君以憂歸免喪也為緝事者言收繫錦衣獄正德丁卯
五月獄成詔免為庶人瑾既誅始復虞衡郎中致仕徇
祥為樂纔八年爾而又痿痺不履明年乙亥夏四月庚
戌卒矣生天順丁丑二月日春秋五十又元配王氏德
宜於君君病以藥弗效割股進之得少甦及卒之前日
又割以進人莫不歎其難然事雖不經亦可以見公所
以處乎其內者有道也生男子四人女子一人皆早死

惟時勉一人存生有二女子六月庚午將葬君辛市先
塋之次時勉以狀來請銘云為君所遺命於乎君英毅
豪爽之氣由今觀之蓋寥乎無儔然亦止如是豈非斯
人之不幸彼僥倖污穢非刺不道者方且指而議之謂
君為愚而其分何但堅白水火不相侔也又安知君之
云何語曰富貴不能淫威武不能屈此之謂大丈夫此
可以喻君矣君篤義樂善能急人之難渭南安生程生
與長安趙生皆客死太學不能歸君為置棺歸之至於

成事此貴人所易忽忘故吾猶及之是以使人矚君之
細矣甲戌冬暮予如渭南訪君望君顏色雖病猶如渥
丹聽其言論侃然古今之際道術之指纖細曲盡益喜
望君無恙乃歸而求諸已病者歷百數十人始得異方
亟以寄君則先吾方三日逝矣豈非數之所定非人之
能移哉於乎傷哉銘曰云云

奉直大夫通州知州張君墓志銘

君諱舜舉字邦獻別號東崖子家世武功人勝國時代

有令人曾祖輻生顯宗讀書不仕為縣啟蒙師予猶記其教法嚴肅為近所未覩也生璠為鄉飲賓以君歸贈承德郎配鄭氏榆社丞莊女也亦以君貴贈安人生君與其弟舜賢君天性穎悟不凡長為縣學生科目文字所出必異先君子特愛敬之後果為遠菴虎谷時敏所重弘治甲子中鄉試高等以乙榜拜太原縣學教諭教人有法諸生畏焉丁卯應聘為順天同考最號得人已而有鄭安人喪服除復麻城士大夫見其教法甚禮重

君庚午復應聘為四川同考所收皆名士尋陞儀封知縣政通人和蔚為中州守令之望撫按以才堪於繁奏調內鄉聲稱日隆吏民益協薦論之疏後先相踵未幾封君卒乃以憂歸起復吏部時大興缺令部尚書殊難其人點名及君曰吾有良大興矣君處至繁之地若無事然京師人語曰天子愛民錫我良令大興廳事久廢壞至不能蔽風雨君請於上以官房為前後堂輪奐之美甲於畿內公卿具以其賢卓絕於時值通州缺守遂

陞君知通州通州去京三十里東南要路也中多貴人
宦官凡事相涉有貴人者請謁不獲遂以誣罷君君慨
然求歸詩酒之遊里閨之樂凡七閱年其心陶然非區
區以仕為膺者班也嘉靖庚寅三月丁巳病感寒不起
由生成化丙戌月日春秋六十有五初娶徐氏卒無子
繼娶王氏壽官鉞女也俱封安人亦先君卒生三男子
長汝為季汝明皆縣學生仲汝翼服家人業一女子嫁
生員談文孫男子二善繼善性孫女子二幼未許聘又

繼娶馬氏清豐薄萬衢女汝為等將以是年十二月庚申葬君於城北祖塋與徐王二安人合兆狀來請銘予與君殊厚義不可辭因記君大興事若審編之公惟醴泉解理常與君不避豪右毅然獨行為民所悅服他無聞也其謙以居鄉廉以蒞職則士大夫之艱節若君何忤哉銘曰城北之阡膺膺延延同責厥儷萬世是安子孫振振後不愧前詩書之裔武功是瞻君才偉卓蔚惟時賢位不並德壽胡亦然昭茲我銘倘為世傳

南城兵馬司指揮馮公墓誌銘

公諱義字時宜家世武功人也曾祖成生春春生內鄉丞諱寅惇德好學教人弗厭有古昔鄉先生之風焉海為童子時實從內鄉公游是時內鄉公方仕宦歸餘祿猶物也而終日端坐聚徒為教海侍數年絕不見與人羣飲此其誼意豈但近世鮮見哉內鄉公配李氏生三子長曰仁季曰智其仲乃公也公生而篤厚長而克敏累舉不第弘治甲子歲貢上禮部海時承乏翰林與公

日相往來有士人某者素陰毀公或又至面謾公公遇之一如罔有聞者後士人攬糧失利諸納戶執而聲訴矣與士人素厚者皆避不與士人言公聞之獨匍匐詣予酸淚雙下曰吾何忍其妻子之不能還與其身之就死無救也立券求予貸予方怨此士弗馴於義若是卑也乃因公之誼有哀心焉於是求所厚者得五十金予公公持以投納戶士人獲免焉公之行事其平生益多類此者古稱篤義畧怨犯而不校豈非斯人之徒哉正

德丙子除南城兵馬副指揮卓有譽聞當塗者交相薦
之行且遷矣公奮然曰仕者所以行其志也予雖然亦
行其所志已矣今予老且倦矣若俟其至而後去則亦
安知予之恒不異是也於是懇求歸焉吏部嘉之進公
為兵馬指揮特許其歸給執照使為鄉人式焉歸後二
年為嘉靖甲申七月丙戌公忽以疾卒於正寢計其生
正統己巳十一月壬午春秋七十有六配楊氏有婦德
宜於公弘治壬子十一月丁未先公卒生景泰辛未九

月庚子年纔四十有二云生男子三人世泰世用世亨
而世泰吏部聽選官四女子長適予兄淮次適徐愷又
次適郭某某死值予嫂亦死後繼歸予兄焉季適黨某
有孫男子幾人孫女子幾人其裔盛矣繼配某氏無出
世泰等以予知公深宜以銘公之墓於是繫之辭曰生
也好義歿也允貴子孫克世公乎何累

祭文

祭粟文

維嘉靖八年己丑十一月二十七日己未父澁西老人
以牲醴庶羞祭於兒粟暨新婦貞烈楊氏曰恩莫重乎
父子事莫大於死生吾昔以有爾而樂今爾死矣吾將
孰樂形影自顧行道心悲况老且病邪即後有疾如去
冬則誰將汲汲奔走如爾者於乎吾心裂矣尚何言矣
人有微小疾病尚百方拯救惟恐害事新婦則視死如
歸若如膾食蔗豈故自輕其生不念父母養育之恩邪
然綱常所係尤有大於是者故新婦樂然就死以鴻毛

視生非爾父母家教與吾兒履方迪義之效何以有是
於乎痛哉明日吉辰往瘞爾柩於前王新婦之壙腸斷
心裂不能汝留惟爾有靈其歆承之

祭北山文

維嘉靖十二年歲次癸巳二月甲戌朔二十三日丙申
前翰林修撰康某謹以采毛庶品奠於故中憲大夫都
察院左僉都御史姊丈北山先生之靈曰於乎北山乃
竟不起邪骨肉之親金蘭之契三十餘年而莫逆者公

一人爾我方以公在足以相依語笑同終天年而公乃
有此聞訃之日痛徹五內然安能復得見公握手道故
昔哉於乎生死者理之常而數之定也年登七旬正終
牖下有子有姪庶孝之節文章之譽海內章縫之士孰
不仰之丈夫之事備矣盡矣尚何云歟聊陳薄奠以表
我哀先生其右臨之尚饗

代南臯祭北山文

維公稟德宏邁知能先覺高不抗俗和不隨物撫仕昌

朝人比管樂觀風畿內女姦貪是却節鎮宣府恢拓廣博
勲業垂成脩爾擯落歸田念年宿志愈恪明農水北何
愧何忤間有德音褻然古作某忝舊遊訪公梓里握手
數言益欽膚美聞訃已久心恒惻然聊陳薄儀用奠几
筵公靈不昧鑒此微虔孰德如公不為世傳尚饗

祭虞部張大夫文

於戲自古文章之士能以稱述為世高者蓋少焉公自
齟齬至弱冠人人皆畏之及舉進士為虞衡大夫人又

以公為詘也何至是乃又以歿邪於戲古稱文章之士
獨得天地之秘故不能多壽與大爵祿若韓退之柳子
厚蓋已有然者矣公之作聞之於人傳之於耳固不知
與二公何似也其所遇則大槩類矣於戲哀哉某等往
歲試禮部實公所舉故於公之卒無不哀焉士於知己
其報也恒重然茲已無及已苟無恙當取公之文傳之
尚享

行狀

先平陽府君夫人張氏行實

先君諱鏞字振遠上世故固始人七世祖政始徙來居武功長寧甚富實有貲又能慷慨任義故長寧人倚仗之子廷瑞博學篤行任元為興化學官云有論禮樂變易之事於元不可攷矣生六子其三曰世睦純行不仕生二子珪琪琪善稱述文義亦不仕生子諱汝楫初為武功訓導高皇帝時詔求文學端正之士教太子乃辟為燕府官後乃出為安岳令文帝既內靖召為北京行

部左侍郎授璽書留輔皇太子凡北京事得自治行之
文皇帝眷念功德將封爵為侯固死不受及卒仍上表
乞免賜贈秩上竟允之乃官其子爵上林苑監正裡上
林苑監副至昭皇帝時始贈資善大夫工部尚書馬爵
累官至中議大夫贊治尹南京太常寺少卿性耿介不
與物事至則亡避患害為之故數言時事便宜皆得無
怒時貴人生子諱健睿皇帝以為通政司知事食半祿
終身奉祀先尚書天順間嘗言漕河事宜皆深有計度

不得行故所自志者咸由是毀矣夫人曰袁氏浙江按察司僉事溥女生子五人長先君次銓次錫次鑾次錦先君生而哲靈年八九歲即孝友善文辭有所著者長老爭紀頌之弱冠益深詣事理曰述序不若馬遷理辯不若蓋軻功澤不若伊傅是未可已矣故其意雅與數代爭雄焉初以先太常居南京故就辟試南京南京士來試者皆尊禮眡之然數不第乃後歸試關中關中來試者又皆尊禮眡之然乃又數不第及後歲貢來太學

來太學乃又就試太學來試者乃又皆尊禮賤之然乃
又數不第乃請改南雍以就先曾太常之域居祠焉曰
凡吾所為試求以見志於世今若此非吾不解時文是
命獨弗可耳與我匍匐然求合於時孰與我修先王之
法終身也故一切削去倥傯不欲聞及後又覽莊老及
浮圖書歎曰人以形骸處天壤其速絕若飄風也予行
年五十又四矣吾弗以忘功名之會是取速絕而已夫
孩提於班白期甚遠今忽忽若瞬息即能至百歲政少

半耳京生有言孰易如華孰化如燬言生死易至也夫
喜生者欲心恒安佚也君子疾沒世而名弗稱傷功名
之不立也夫功名於身至疏也古之人以死效此者謂
可萬世不與物朽至厚身也今不得之功名又因以勞
廢心體是非喜生之道耳語曰百人射招亡弗中矣百
物誘生亡弗傷矣夫乃今於吾可以已矣乃遂自謂為
已菴君後五年因出為平陽府知事知事甫一年歸歸
一年病癱痿不履又二年弘治壬子正月癸巳乃不起

生宣德庚戌四月辛未春秋纔六十三矣夫人曰張氏
邢郡名家女父曰賢仕為南京鴻臚序班忼爽有執故
嘗與先公通政交甚厚也配陳氏生夫人陳氏卒鴻臚
公亦卒夫人乃依母氏母舅陳君者南京親軍指揮僉
事也亦嘗交先公以先公與鴻臚交也乃歸夫人於先
君柔惠善事事先曾太常李夫人李夫人甚篤愛以為
有嗣婦矣事祖妣袁夫人袁夫人又甚篤愛以為可以
事太君夫人矣太君夫人者袁夫人以謂曾太常李夫

人者也李夫人性善嚴肅先公年過五十猶不敢侍坐侍媵至白首不能審識意向惟夫人獨能懽心矣不可謂善事已矣性又遜惠亡所私方來歸先君四叔皆少也衣被一切與為補紉及叔皆壯有子又視其子懇懇劇劇亡以異不肖故四叔與羣姪子女皆終身善感夫人若母者矣夫先君取夫人才再歲也即歸試闈中十餘年十餘年乃更見之未嘗有怨恫固曰母以妾累君子之志母以妾累君子之志生男子二人長阜穎敏有

神年七歲善詩又善為楚騷十八歲死李海支謾儻蕩亦頗修其先人之業然莫能閔也以時文謬舉壬戌進士第一為翰林修撰取尚氏女子一人嫁為乾州士人習五車妻故有孫男子二人俱殤矣今所存者有孫女子三人與新生孫昭允也嗚呼先君碩美有容膚體若凝玉人望之如神仙有接其論者充充然如有重獲也屬文賦詩皆簡古爾雅漢魏以降殆莫有尚也與靈臺人楊重長安人李錦同稱為關內三才然其明當今之

務察識事實可以名實潤澤亡虛恢者若先君蓋數代
鮮矣方歸試時考官列置第一及拆卷叅政張用翰亟
謂御史曰此三秦豪傑可以佐伯王者吾故聞閻文振
言今乃幸自見也願遂予之文振者故順天尹馬嵬閻
公鐸也取於先太常之子於先君為姑御史以故與閻
氏隙也乃遂置先君不予第後叅政語先君曰是我以
誤先生也先君曰僕自外試於今皆可取上第然皆不
能取固非皆御史也乃是吾命耳然於吾何疑焉卒不


怨御史也成化甲辰關中大饑人相食先君方南遊甌
越遽召所故厚者集數百金具載糴西來至汴糴盡為
盜掠乘舟又數被風顛沛幾沒中心怵怵營營鄉里事
勢益窮峻亡訊乃冒恐疾馳至家見先太夫人跪膝下
殞越欲絕然由是遂成病心及其卒時心病未間也少
壯時所交盡名公長者餽遺常積至千金隨以奉獻先
公先太夫人後乃盡授諸弟諸弟皆怡怡惇惇惟恐勿
有歡心不稱至於今諸弟苟有言之皆咽嗚泣下固非

以其能散已也昔先公教五子各一經舉進士皆先君躬自講授蚤夜孳孳然惟恐弗能寧先公也後子阜長益欲教育為聞人阜死不肖才一歲其生稟未覘也乃歎曰天乎我固以窮乎乃果弗庸顯吾宗乎不肖既六歲能誦口授始稍稍不煩憤十二教以古今賢聖之迹及指要同異曰今固未必知苟一一記吾言當後有思可以成名人不肖雖私能識之然好逐趨童子羣戲凡戲又多支謾亡狀先君益重自怒絕乃長棄不復教至

於其大病始思繹所故嘗指者則先君已弗省解矣今雖能致錫命於先君然先君又安可知也幸猶及先夫人先夫人乃又已矣嗚呼其已已矣先夫人言當先曾太常公及先曾夫人喪時先公哀毀至骨立凡事治皆先君行焉先公先太夫人有疾晝夜不解衣宵旦百拜籲天必及可乃已後至先公先太夫人之喪適家事中替先君極力勉成大事哀隕號極幾不能生也是非其至孝哉然先夫人實能宛轉相先君凡先君所欲與不

肯留也所欲向不肯後也始不肖以官祿事先夫人先
夫人每食輒泣下曰昔太夫人謂爾父及諸叔有養如
此乃不能俟見之爾父亦謂必以養太夫人及能視爾
榮顯然又恐不逮顧我身自享之又眎所抱孫謂苟百
歲以報爾太夫人及爾先君可含笑下里矣先夫人卒
時二孫已殤折今幸有昭允然安可知也嗚呼其慟也
已矣先君故有文字數萬言皆散在知己間所存者僅
三四十策耳命曰已菴集先夫人生宣德甲寅三月乙

酉至卒日正德戊辰八月戊寅春秋實七十有五嗚呼
先君隱行甚衆其詳細多在長老口今不能一一載載
其大且槩者其先君之風因明著矣不肖常竊怪世俗
好誣謾其先人益重為人指議心甚傷之故述事多不
盡先生文思深厚凡評論皆當實不修也惟采擇以加
堅石斯康氏事行久遠矣此恩德至厚永世者幸惟先
生圖焉



對山集卷八